

Лувр музейидаги Катта Лангар Қуръони дунё сайёҳлари нигоҳида



21:01 / 27.11.2022 1935

Шу йилнинг 23 ноябрдан 2023 йил 6 мартга қадар Париж шаҳрининг Лувр музейида “Ўзбекистон воҳалари хазиналари. Карвон йўллари чорраҳасида” мавзусида Ўзбекистон музей ашёлари кўргазмаси бўлиб ўтмоқда. Ушбу кўргазмани ташкил этиш ва ўтказишга масъул ташкилот Маданият ва санъатни ривожлантириш жамғармаси ҳисобланади.

Кўргазмада мамлакатимиз тарихи ва маданиятига оид энг сара топилмалар, нодир экспонатлар намойиш этилмоқда. Ўзбекистонни дунёга танитиш йўлида қўйилган ушбу катта қадам ҳар томонлама самарали бўлиши ва ҳамкорлик учун янги эшикларни очиши кутилмоқда.

Мазкур кўргазмада Ўзбекистон мусулмонлари идораси Кутубхонаси фондидаги Катта Лангар Қуръонининг икки саҳифаси ҳам тақдим этилди.

Маълумки, Диний идора тизимида ушбу кўргазмага тайёргарлик жараёни бир неча босқичда кечди. Хусусан, шу йилнинг 5 октябрь куни Ўзбекистон мусулмонлари идораси раиси, муфтий Нуриддин домла ҳазратлари идора Кутубхонаси фондидаги Катта Лангар Қуръонининг сақланиш жараёни билан яқиндан танишиб, бундай бебаҳо меросларни асраб-авайлаш, уларни келажак авлодга бус-бутун етказиш ва тадқиқ этиш ишларига катта эътибор қаратишни алоҳида таъкидлаган эдилар.

Шунингдек, идора кутубхона ходимларининг Францияга сафари олдидан Ўзбекистон мусулмонлари идораси раисининг биринчи ўринбосари Ҳомиджон домла Ишматбеков кўргазма муваффақиятли ўтиши ва динимизга, юртимизга манфаатли бўлишини сўраб дуо қилган эдилар.

Шундан сўнг Ўзбекистон мусулмонлари идорасидан Кутубхона мудирини Камолиддин Маҳкамов ҳамда реставратор Саидрахмат Икромовлар Францияга йўл олиб, Лувр музейида кўргазмага тайёргарлик ишларини ноябрь ойининг 14-15 кунлари якунлаган эди. Улар Лувр музейи ходимлари билан ҳамкорликда Катта Лангар Қуръонининг икки саҳифасини эҳтиёткорлик билан кўргазмалар залидаги махсус коллекция сандиқларига жойлаштириб, кўргазмага шай ҳолатга келтирдилар.

Президентимиз Шавкат Мирзиёев Францияга ташрифи чоғида мазкур кўргазманинг очилиши маросими бўлиб ўтди. Унда Ўзбекистон делегацияси билан бирга Франция Президенти Эммануэль Макрон рафиқалари билан иштирок этиб, “Ўзбекистон воҳаларининг мўъжизалари. Карвон йўллари чорраҳасида” кўргазмасига ташриф буюриб, Лангар Қуръони саҳифалари билан танишдилар. Мазкур очилиш маросимида Ўзбекистон мусулмонлари идораси раиси ўринбосари Иброҳимжон домла Иномов ҳам қатнашди.

Таъкидлаш жоизки, мазкур кўргазмада Франция Президенти Лангар Қуръонига алоҳида эътибор билан қараб, унинг қачон ва қандай ёзилгани ҳақида қизиқиш билдирди. Шу билан бирга бундай тарихий мерос ҳар бир музейга ташриф буюрувчини беэътибор қолдирмаслигини таъкидлади.

Эндиликда бутун дунё таниган ва бутун дунё тан олган жаҳоннинг энг машҳур музейига йилига 10 миллиондан зиёд ташриф буюрувчилар юртимизнинг ўзига хос тарихий бой мероси билан танишиш имкониятига

эга бўладилар.

Ўзбекистон мусулмонлари идораси Матбуот хизмати